

## Novi projekat našeg udruženja

Nakon dvogodišnjeg plodnog rada na polju islamskih aktivnosti, prezentaciji ispravnog poimanja i shvatanja Kur'ana i sunneta, te vođenja brige o potrebnim i ugroženim muslimanima ovog područja, udruženje građana "Savjet", je zbog nedostatka prostorija u kojima je uspješno djelovalo, prinuđeno sve svoje aktivnosti svesti samo na kancelarijski oblik rada.

Udruženje je potpuno svjesno da je neophodno da posjeduje svoje lične, odgovarajuće prostorije iz kojih će neometano djelovati, te je na posljednjem sastanku dat i usvojen prijedlog prikupljanja sredstava za izgradnju ili kupovinu istih. U ovaj projekat udruženje je uključilo konstantno 30 osoba (većinom članovi udruženja i njegovi simpatizeri), a ukoliko broj bude veći projekat će ići brže i lakše.

Odlučeno je da od ovih 30 osoba, oni koji su u BiH mjesečno izdvajaju za ovaj projekat po 50 konvertibilnih maraka, a oni koji su u inostranstvu za ovaj projekat izdvajaju 100 konvertibilnih maraka. Za svaku osobu će se dosljedno voditi evidencija, s toga se od iste traži maksimalna pažnja i vođenje računa mjesečne uplate koja će biti između 15.-tog do 20.-tog svakog mjeseca.

Od vodstva udruženja se zahtijeva da prvi učestvuju i najviše se zalažu u ovom projektu.



## Projekat je podijeljen u dvije realizacije:

Prva: Prikupljanje sredstava godinu dana nakon čega će se razmotriti uspješnost projekta.

Ukoliko se nakon analize ustanovi da je projekat neuspješan u tom slučaju se novac vraća svakom donatoru pojedinačno shodno ulaganju koje će biti evidentirano, ovakav način predstavlja i sigurnu štednju za donatora ukoliko projekat bude neuspješan.

Druga: Ukoliko se ustanovi da je projekat uspješan kreće se ka realizaciji istog, dali kroz kupovinu zemljišta za novogradnju dali kroz kupovinu već postojećeg objekta koji odgovara namjeni udruženja.

U ovom projektu nisu izostavljeni oni članovi udruženja niti simpatizeri koji se ne mogu uključiti u redovna mjesečna izdvajanja od 50 ili 100 konvertibilnih maraka, naprotiv svim takvim preporučujemo da kontaktiraju vodstvo udruženja i obavežu se na mjesečno izdvajanje pa makar bilo minimalno.

Na ovaj način će svaki pojedinac biti učesnik projekta, a s druge strane ulazimo u značenje hadisa u kojem je Allahov Poslanik, sallahu alejhi ve sellem, upitan o djelu koje je Allahu najdraže pa je odgovorio:

«أَدْوَمُهُ وَإِنْ قَلَّ»

"Djelo koje je konstantno (stalno se izvršava bez prekida) pa makar ono bilo i malo".

Također, u ovaj projekat se uključuje i svaki onaj koji niti je član udruženja niti njen simpatizer ali želi pomoći njegovu realizaciju.

## Udruženje građana

# SAVJET

Brčko distrikt BiH  
Maoča bb  
Bosna i Hercegovina

ID: 4600279860006  
broj Rješenja u Sudu: 096-0-F1-09-000057  
www.savjet.ba  
savjet@live.com  
fax: 049/521-066

*Prenosi Ebu Rukajja Temim Ed-Dari,  
radijallahu 'anhu, da je Allahov poslanik,  
sallallahu 'alejhi ve sellem, rekao: "Vjera je  
savjet."*

Udruženje građana SAVJET je udruženje koje uspješno egzistira dvije godine sa sljedećim programskim ciljevima:

Religijsko-društveni;  
Edukativni;  
Humanitarni;  
Rekreativni;

## Religijsko-društveni ciljevi

Cjeloukupno djelovanje udruženja građana SAVJET jeste i osnovano na temeljima savjetovanja, potpomaganja i duhovnog oplemenjivanja članova, simpatizera i posjetilaca udruženja.

Sve aktivnosti imaju zajednički cilj, odnosno kroz cjeloukupni rad afirmisati i promovisati pozitivne i moralne vrijednosti.

Jedna od potkategorija ove kategorije jeste i organizacija ramazanskih druženja kroz iftare. Ramazanski ugođaj daleko je ljepši i korisniji kroz zajednička iftarska druženja. Tokom dvije godine aktivnog rada zajedničkim iftarima prisustvovali su i naši gosti iz Tuzle, Gradačca, Podrinja, Srebrenika, Čelića, Sarajeva itd. To su idealne prilike za upoznavanje, širenje međusobne bratske ljubavi, savjetovanje, a i jednostavno razgovaranje.

Pokušavamo proaktivno djelovati na loše pojave u društvu, izlazeći u susret sugrađanima, pomažući im u nevoljama, te time praktičnim primjerom pokazujući kako musliman treba da bude aktivan u svojoj okolini.

## Edukativni

Pod ovom kategorijom neminovno je spomenuti sljedeće sekcije našeg udruženja:

1. Sekcija sufare
2. Sekcija tedžvida
3. Halka Kur'ana
4. Sekcija arapskog jezika
5. Sekcija hifza Kur'ana (učenja Kur'ana napamet)
6. Sekcija hadisa

Kroz navedene sekcije je u dosadašnjem radu prošlo preko *stotinu kandidata* koji su ostvarili veoma dobre rezultate. Od pamćenja nekoliko džuzeva iz časnog Kur'ana, pamćenja hadisa Allahova Poslanika, sallahu alejhi ve sellem, upotpunjavanja komunikacije na književnom arapskom jeziku itd.

Pored sekcija oformili smo grupu za organizovanje i koordiniranje svih ovih naučnih skupova.

Uspješno smo u navedenom vremenskom intervalu organizirali nekoliko javnih tribina i veliki broj predavanja. U našem planu i programu rada obuhvatamo mušku i žensku populaciju.

Svake godine organizujemo ciklus javnih tribina u Bijeloj džamiji u Brčkom. Gosti su eminentni predavači, a prisutnost je na veoma dobrom nivou. Do sada smo boravili u iznajmljenom prostoru u kojem smo otvorili vlastiti poligon za izučavanje vjerskih znanosti, jezika, odgovaranje na trenutna, aktuelna pitanja i polemike našeg društva.

## Humanitarni

*„A oni koji vjeruju i dobra djela čine, obraduju džennetskim baščama kroz koje će rijeke teći...”  
(El-Bekare, ajet 25.)*

Svake godine sistematski se organizujemo u skupljanju zekata, sadaktul fitra i sadake, koju podijelimo ugroženim stanovnicima našeg okruženja. Nekoliko puta smo organizovali podjelu bajramskih paketa, koji su obuhvatali osnovne kućne namirnice.

Cilj i svrha ovih paketa i jeste pomaganje onih kojima je pomoć najpotrebnija. Reakcije tih ljudi su veoma emotivne, a njihov osmijeh i sreća neopisivi.

## Rekreativni

Prilikom druženja u prirodi organizujemo i rekreaciju za omladinu kroz nogometna i druga takmičenja. Također naši najmlađi imaju priliku se družiti i u prostorijama i kroz rekreativni niz aktivnosti udruženja.

U našem radu nastojimo da dostavimo islam i njegove univerzalne poruke svima onima koji se žele upoznati sa islamom, koristeći se pritom metodom jasnog prezentiranja i argumentiranja.



Želimo afirmisati moralne i duhovne vrijednosti, kao i podržavanje svega što cjeloukupno čovječanstvo vodi ka istinskom preporodu, napretku i prosperitetu.

Borimo se protiv svih poroka u društvu, bez obzira radilo se o drogi, alkoholu, prostituciji, hazardnim igrama, te borbi protiv svih vidova ekstremizma, šovinizma i nasilja.

Preventivno djelujemo protiv svih destruktivnih i retrogradnih ideja, poput: pozivanja u secesionističku ideologiju odvajanja od društva i zajednice muslimana, neutemeljenog proglašavanja muslimana nevjernicima (ar. tekfir) i slično.